

## Bahagian A (i) - Ringkasan

[ 20 markah ]

*Baca petikan di bawah dengan teliti. Berdasarkan petikan tersebut, tulis sebuah ringkasan tentang cara-cara menanam rasa cinta akan alam sekitar dalam kalangan masyarakat. Panjangnya ringkasan anda hendaklah tidak melebihi 80 patah perkataan. Anda digalakkan supaya menggunakan ayat anda sendiri tanpa mengubah maksud asal petikan.*

Pembangunan yang terlalu pantas boleh menyebabkan generasi kini dan akan datang kehilangan alam semula jadi yang boleh dinikmati. Langkah-langkah mengatasinya perlu diambil untuk mendidik masyarakat supaya menyayangi alam semula jadi agar terus terpelihara dan selamat.

Media memainkan peranan yang penting untuk mendidik masyarakat tentang kepentingan menjaga alam sekitar. Hal ini demikian kerana media massa seperti televisyen ditonton oleh jutaan penonton seluruh negara manakala media cetak dibaca oleh jutaan rakyat yang merangkumi pelbagai lapisan masyarakat. Oleh itu, mesej dapat disampaikan dalam pelbagai cara dengan lebih berkesan. Tanggapan sesetengah pihak yang menganggap pemuliharaan persekitaran dan warisan alam merupakan tanggungjawab kerajaan perlu diperbetulkan. Sebagai individu yang bertanggungjawab, setiap orang perlu memainkan peranan masing-masing kerana menjaga kebersihan alam sekitar merupakan tanggungjawab bersama.

Amalan kitar semula yang dimulai dengan kertas, plastik dan aluminium hendaklah dilaksanakan dengan sepenuhnya. Selain selamat, bahan kitar semula juga bersifat mesra alam dan dapat menjaga persekitaran yang selesa. Selain itu, langkah menggalakkan orang ramai menggunakan perkhidmatan pengangkutan awam sudah tentu akan dapat mengurangkan masalah pencemaran udara dan kesesakan lalu lintas. Ibu bapa haruslah mendidik anak-anak sejak kecil supaya membuang sampah di tempat yang betul kerana melentur buluh biarlah dari rebungunya. Sungai, laut, tasik dan sebagainya bukanlah tempat untuk membuang pelbagai sampah sesuka hati. Hukuman yang setimpal juga harus dikenakan kepada segelintir pihak yang suka mengambil jalan mudah menjadikan sungai sebagai tempat pembuangan sampah, sisa toksik dan bahan buangan kilang.

Kegiatan kokurikulum melalui Kelab Pencinta Alam di sekolah melaksanakan pelbagai kegiatan yang boleh menanam dan membudayakan rasa cinta terhadap alam sekitar dalam kalangan murid. Peranan syarikat-syarikat swasta juga penting supaya orang ramai lebih menyedari isu-isu alam sekitar yang *semakin meruncing*. Orang ramai perlu diberi pendedahan dan kesedaran tentang kepentingan hutan yang damai dan menenangkan. Tidak ada yang lebih indah daripada menikmati keindahan alam dengan iringan alunan unggas pelbagai irama. Tanpa langkah yang berkesan, tidak mustahil jika suatu hari kelak semua keistimewaan dan keunikan khazanah hutan ini hanya tinggal kenangan sahaja.

( Dipetik dan diubah suai daripada rencana  
'Cintai Alam Sekitar' , *Fokus*, Julai 2010 )

**Bahagian A (ii) - Pemahaman**

[ 10 markah ]

Berdasarkan petikan **Bahagian A (i)**, jawab soalan-soalan yang berikut dengan menggunakan ayat anda sendiri.

1. Berikan maksud rangkai kata *semakin meruncing* [2 markah]
  
2. Mengapakah media massa paling berkesan dalam memberikan kesedaran kepada orang ramai supaya bertanggungjawab menjaga alam sekitar ? [4 markah]
  
3. Pada pendapat anda, apakah aktiviti-aktiviti yang boleh dilakukan di sekolah untuk menyemai rasa cinta akan alam sekitar dalam kalangan murid ? [4 markah]

## Bahagian B

[20 markah]

Berdasarkan gambar di bawah, huraikan pendapat anda tentang kesan-kesan obesiti terhadap individu. Panjangnya huraian anda hendaklah tidak melebihi 120 patah perkataan.

### KESAN-KESAN OBESITI

Terdedah kepada pelbagai penyakit kronik

Mengehadkan pergerakan

Meningkatkan perbelanjaan

Kurang keyakinan diri



## **Bahagian C**

[40 markah]

**Pilih satu daripada soalan di bawah. Tulis sebuah karangan yang panjangnya lebih daripada 180 patah perkataan.**

1. Kawasan perumahan anda telah mengadakan gotong-royong bagi membanteras dan menghapuskan tempat pembiakan nyamuk Aedes.  
Anda sebagai setiausaha jawatankuasa kawasan perumahan ditugaskan untuk menyediakan laporan tentang aktiviti gotong-royong tersebut.

Tulis laporan itu selengkapnya.

2. Keluarga memainkan peranan penting dalam pencapaian akademik murid.

Berikan pendapat anda.

3. Anda telah memperoleh keputusan cemerlang dalam peperiksaan. Dalam satu majlis, anda dikehendaki menceritakan usaha-usaha yang telah anda lakukan sehingga memperoleh keputusan yang cemerlang.

Sediakan ucapan anda selengkapnya.

4. Kementerian Pelajaran mewajibkan setiap murid mengambil bahagian dalam aktiviti kokurikulum. Malah, penglibatan murid-murid dalam aktiviti kokurikulum akan dinilai untuk melanjutkan pelajaran ke pusat pengajian tinggi.

Terangkan faedah-faedah yang diperoleh apabila seseorang murid terlibat dalam aktiviti kokurikulum.

5. Peribahasa 'Bagai mencurah air ke daun keladi' bermaksud seseorang yang sukar ditunjuk ajar atau dinasihati.

Tulis sebuah cerita menarik berdasarkan peribahasa ini.

## Bahagian D

[10 markah]

Jawapan anda hendaklah berdasarkan **satu** daripada novel yang telah anda kaji di Tingkatan 1, Tingkatan 2, **atau** Tingkatan 3.



Dalam setiap novel, terdapat watak-watak yang memainkan peranan untuk menggerakkan cerita. Huraikan **satu** perwatakan bagi watak-watak yang disenaraikan dalam novel yang anda pilih.

**KERTAS SOALAN TAMAT**